



## Early Journal Content on JSTOR, Free to Anyone in the World

This article is one of nearly 500,000 scholarly works digitized and made freely available to everyone in the world by JSTOR.

Known as the Early Journal Content, this set of works include research articles, news, letters, and other writings published in more than 200 of the oldest leading academic journals. The works date from the mid-seventeenth to the early twentieth centuries.

We encourage people to read and share the Early Journal Content openly and to tell others that this resource exists. People may post this content online or redistribute in any way for non-commercial purposes.

Read more about Early Journal Content at <http://about.jstor.org/participate-jstor/individuals/early-journal-content>.

JSTOR is a digital library of academic journals, books, and primary source objects. JSTOR helps people discover, use, and build upon a wide range of content through a powerful research and teaching platform, and preserves this content for future generations. JSTOR is part of ITHAKA, a not-for-profit organization that also includes Ithaka S+R and Portico. For more information about JSTOR, please contact [support@jstor.org](mailto:support@jstor.org).

## PANTALEON

### VON KONRAD VON WÜRZBURG.

*Daß die Wiener handschrift 2884 (ehemals Philol. 120) hinter Rudolfs Barlaam und erzählungen des Strickers ein gedicht über den heiligen Pantaleon enthalte war mir aus dem Museum für altd. lit. und kunst 1, 599, Graffs Diutiska 3, 352 und Hoffmanns verzeichnis der altd. hss. der Wiener hofbibliothek s. 92 längst bekannt; aber ich muß die schlufszeilen dieses gedichtes gar nicht oder so unaufmerksam gelesen haben wie die welche sie abdrucken ließen und in dem dort erwähnten Johannes von Arguel den verfasser erblickten. ein zufall ließ mich neulich in Hoffmanns buche jene verse genauer ansehen, und nun mußte ich wohl den dichter erkennen. mein freund Karajan, dem ich die kleine entdeckung meldete, ließ sogleich eine abschrift für mich nehmen, aus der ich das gedicht in wenigen tagen und mit geringer mühe für die herausgabe reinlich darstellen konnte. denn die handschrift, pergament, aus dem vierzehnten jahrhundert, verdient alles lob.*

*Johannes von Arguel, für den Konrad von Würzburg die legende vom heiligen Pantaleon in deutsche reime brachte, tritt als ein fünfter Baseler beförderer seiner dichtkunst zu den bereits bekannten, den domherren Leutold von Rotenleim, auf dessen bitten er den Silvester reimte, und Dietrich an dem Orte, für den er den trojanischen krieg verfaßte, und den beiden bürgern Johannes von Bermesweil und Heinrich Iselin, denen er den Alexius dichtete. der sogenannte Albert von Straßburg, bei Urstisius Germ. hist. 2, 113, erzählt von Johannes von Arguel und vom Baseler bischof Peter Reich (Petrus Divitis), der nach Ochs gesch. von Basel 2, 6 von 1286 bis 1296 bischof war, qui episcopus cum quadam vice quaedam in consilio Basil. peteret, Ioannes de Arguel, cui plebs adhaesit, contradicens ab episcopo dicente 'ego faciam tibi erui oculos tuos' illa vice de*

loco consulum est expulsus. cui etiam civi de Arguel Petrus Scalarii senior, miles valentissimus, in consilio sibi resistenti respondit 'nescis quod in una domo paterfamilias et scrofa morentur, sed aliter et aliter teneantur?' *die folgenden nachrichten verdanke ich durch Wilhelm Wackernagels freundliche vermittlung herrn doctor Fechter in Basel.* Iohannes de Arguel besaß im j. 1297 einen garten uf Kölehusern d. h. bei der Leonhardskirche, nach einer angabe in der registratur dieser kirche; einer des gleichen namens, aber ohne jahrzahl, kommt als bewohner des hauses zem tor (am Eschemer thor) in Urstisius handschriftlichen analekten vor. sonst aber gehörte denen von Arguel das spätere haus der bäckerzunft (an der freien strafse): domus dicta Arguel nunc zunfta pistorum, excerpt einer urkunde von 1363 in denselben analekten. — ich setze hinzu dafs die von Arguel seit 1264 aufser besitz der burg Arguel (jetzt Ergüel) gewesen zu sein scheinen; wenigstens trat in diesem jahre, nach einer urkunde des Baseler bishofs Heinrich, bei Herrgott geneal. Habsb. 2, 387, Otto von Arguel partem castri de Arguel ipsum contingentem, advocatiam ibidem et omnia feoda quae ab ecclesia nostra Basiliensi vel eo iure quod burelein dicitur vel alio quocunque tenebat in valle sancti Ymerii, praeter ea feoda quae alii tenent, ab ipso vulgariter dicta manlein, gegen die quarta decimarum apud Rolzdorf an das bisthum Basel ab. — auch für die bezeichnung der Winharten tohter kint (z. 2141) theilt Wackernagel mir erläuterungen mit. der name Winhart ist im alten Basel häufig. die jetzige hutgasse hiefs im 13n jh. Winhartes gazze; es stand da die domus Winhartin hus (urk. von 1258 im archiv des Petersstiftes). einen Walther Winhart nennt die registratur von S. Leonhard im j. 1290 als bereits verstorben: hinder Walthers seligen Winarts garten und noch einmal ortus quondam Waltheri Winhart. — jenes Winhartin hus zeigt dafs man in genitivus pluralis Winharten sagte: Konrads zeile ist also zu erklären 'kind einer tochter des geschlechtes der Winharten.' — einen Waltherus Winhardi finde ich unter den zeugen einer Baseler urkunde von 1263 bei Ochs 1, 385 und einer von 1271 bei Herrgott 3, 426.

*Konrad hat ohne zweifel die lateinische legende vom h. Pantaleon bearbeitet von welcher die Acta sanctorum im 6n bande des julius s. 400<sup>b</sup> handschriften anführen. sie ist, wie dort bemerkt wird, aus dem griechischen übersetzt: unter anderem bestätigt dies eine s. 414<sup>b</sup> ausgehobene stelle, fili, nihil est Asclepius nec Hippocrates nec Galienus nec ceteri dii quos colit Maximianus, und hieraus erklärt sich bei Konrad s. 231 und 1065 die form Asclēpius. — wenn in Konrads erzählung Rom statt Nicomedia der schauplatz der begebenheiten ist, so wird er auch hierin einem irrthume seiner quelle gefolgt sein: ebenso lassen die Acta s. Hermolai (Acta sanctor. jul. 6, 427 ff.) alles in Rom geschehen.*

17 april 1847.

HAUPT.

148<sup>a</sup> Ez ist ein nütze dinc vernomen  
 und mac ze sælden wol gevromen  
 daz man der liute kumber saget  
 die mit ir marter hânt bejaget  
 der êweclichen wunne leben. 5  
 bîschaft ze reinen tugenden geben  
 kan ir reineclicher tât.  
 swâ man ir angest unde ir nôt  
 des lîbes ôren kûndet,  
 dâ wirt vil schiere enzûndet 10  
 des herzen sin ûf edele tât.  
 swer muot ze reinen werken hât,  
 der mac vil gerne hœren  
 wie si zer himele kœren  
 mit ir marter komen sint 15  
 und wie des reinen gotes kint  
 vergozzen hânt ir reinez bluot.  
 ez ist fûr houbetsûnde guot  
 daz man ir tugende merket.  
 ein herze wirt gesterket 20  
 an reines willen krefte  
 von guoter bîscheffe,  
 und wirt im sûnde wilde.

Die handschrift 16. reine

	von guoter liute bilde	
	den liuten allez guot geschiht.	25
	ûf alsô rîche zuoversiht	
	wil ich ein wârez mære sagen	
	von einem herren der bejagen	
	mit sîner tugende kunde	
	daz im got fröude gunde	30
	und êweclichen fride dort.	
	er hât den liechten himelhort	
	mit maneger nôt verschuldet	
	diu von im wart geduldet	
	durch sîner tugende reinekeit.	35
148 <sup>b</sup>	er vaht mit noeten unde streit	
	der heiden ungelouben an,	
	dâ mite er sêlen vil gewan	
	dem werden hôchgelobten gote,	
	und mac gewinnen sîme gebote	40
	ze dienste noch vil manegen lîp.	
	sîn marter sol man unde wîp	
	hie scheiden von ir missetât.	
	swer sînen tôt vor ougen hât	
	und in ûf erden êret,	45
	der wirt von ime bekêret	
	unde erlöst von arebeit.	
	er ist ein lieht der cristenheit	
	daz in des herzen sinne	
	den glanz der wâren minne	50
	kan bieten unde reichen.	
	dâ von ich sîniu zeichen	
	und sîne marter wil enbarn.	
	daz wunder sol ze liechte varn	
	daz got durch sîne tugent begie.	55
	mit rede wil ich entsliezen hie	
	den namen und die helfe sîn,	
	durch daz den liuten werde schîn	
	daz sîn genâde manicvalt	
	si müge erlœsen mit gewalt	60

28. herzen

31. eweclicher fröde

35. sine

41. maniger

49. daz] der

von allem ungevelle.  
 swer nû sîn leben welle  
 vernemen hie mit reiner ger,  
 der biete herze und ôren her,  
 sô wirt im offen diu getât, 65  
 daz got durch in begangen hât.  
 Ein keiser hiez Maximîân.  
 bi des zîten wart getân  
 der cristenheite schaden genuoc.  
 swer ie geloubic herze truoc, 70  
 148° der wart durch sîn gebot erslagen:  
 er hiez in von dem lebetagen  
 erbermeclichen scheiden.  
 der übele arge heiden  
 was ze Rôme sezhaft. 75  
 sîn keiserlîchiu magenkraft  
 diu schein gar michel unde breit.  
 dâ von hiez er die cristenheit  
 duræhten mit gewalte.  
 mort unde mein er stalte 80  
 mit grimme an den getouften.  
 vor ime sich gnuoge slouften  
 ze walde in manic tiefe hol.  
 ir etelîche jâmers vol  
 verborgen sâzen in den steten, 85  
 durch daz er si niht hieze treten  
 gewalteclichen sînen zorn.  
 ze leide er manegem was geborn  
 den er des libes roubte:  
 wan swer an Crist geloubte, 90  
 der leit von ime die marter.  
 dar umbe in desten harter  
 entsâzen alle kristen  
 und wolten gerne vristen  
 vor ime ir leben unde ir lide. 95  
 si burgen sich durch guoten fride  
 in welden unde in wüesten

73. vn erbermeclichen    82. genuog sich    84. etlicher    88. ma-  
 nigen    90. wer    94. wolte    95. von    96. goten

durch daz si drinne müesten  
 vil strenger noete sich entsagen.  
 nû was ze Rôme bî den tagen 100  
 ein herre Eustorius genant,  
 des herze man gereinet vant  
 von schamelicher missetât.  
 er was ein rîcher sênât  
 der zûhte und êren sich versan. 105  
 der selbe tugende rîche man  
 148<sup>a</sup> het einen schoenen sun erzogen,  
 des muot geneiget unde gebogen  
 wart ze kristenlicher tugent. 110  
 geblüemet stuont sîn reiniu jugent  
 mit durliuhtiger werdekeit.  
 diu sælde was ûf in geleit  
 daz er sich meines muoste schamen.  
 Pantalêôn hiez er ze namen  
 und hete sîn gemüete 115  
 gezieret wol mit güete  
 und mit rîlicher milte.  
 sîn herze in êren spilte  
 alsam ein rôse in touwe.  
 Mâz, aller tugende frouwe, 120  
 lêrt in bescheidenlichiu dinc.  
 er was ein glanzer jûngelinc  
 und ein sô gar liutsælic knabe  
 daz ich von ime gelesen habe  
 er trûege lûterbæren schîn. 125  
 Eustorius der vater sîn  
 hielt in mit grôzen êren.  
 er wolte in heizen lêren  
 diu buoch von arzenie.  
 dâ von der wandels vrîe 130  
 kôs einen meister in der stat.  
 den hiez der edele unde bat  
 daz kint dô lêren disen list.

100. ze fehlt. 101. Eustorius statt Eustorgius hat z. b. *Hrabanus Maurus* unter dem 18n februar (*acta ss. jul.* 6, 399). 104. sanat  
 105. schubte 111. durliûhter 113. niemes 133. da, oft für dô.

## PANTALEON.

199

- der selbe meister alle vrist  
 wont ûf des keisers palas, 135  
 wan er sîn hofgesinde was  
 und in het in der huote sîn.  
 er was geheizen Eufrosîn,  
 und lac an im witz unde vernunst.  
 von arzenie erwelte kunst 140  
 sîn herze vinden kunde.  
 den jûngelinc begunde  
 149<sup>a</sup> der meister wîsen dâ zehant.  
 des knaben er sich underwant  
 und lêrte in sîner buoche schrift. 145  
 nû was ein priester in der stift  
 gesezzen bî der jâre tagen  
 des lîp gereinet unde getwagen  
 mit deme vil hêren toufe was.  
 von Criste sang er unde las 150  
 daz beste daz er wolte.  
 swaz gote zêren solte,  
 daz tet er willeclîche sus.  
 man seit daz Ermolâus  
 genant der priester wære, 155  
 doch niht was offenbære  
 den Rœmern allen worden  
 sîn kristenlicher orden.  
 Er hal sîn leben und sîn ê,  
 wan er entsaz den keiser mê 160  
 denn in der werlte deheinen man.  
 sîn herze in gotes minne bran  
 und was an Crist geloubehaft.  
 diz barc er vor der heidenschaft  
 durch angestlicher vorhte grûs. 165

141. binden    145. sine    147. den iaren tagen    152. ze gottes  
 154. Ermolâus ohne H, das z. b. auch bei Hrabanus fehlt,  
 ist 365 und 1722 durch den vers sicher. nur 1358. 1889. 1931 hat  
 die hs. H, wie in Hermippus 1744. 1785. 1890. 1930 und an drei die-  
 ser stellen in Hermocrates. daneben ist 1891 Ermocrates durch die  
 hs. angedeutet und durch den vers gefordert. in allen drei namen  
 das H zu tilgen erlaubt überall der vers, aber es ist mir glaublich  
 daß Konrad selbst schwankte.    165. d. angestliche vorhte grōz



Pantalêôn gienc durch sîn hûs  
 swenn er ze schuole solte gân.  
 dà von der reine capellân  
 den knaben dicke und ofte sach.  
 zeimâl gruozt er in unde sprach 170  
 'kint liebez, frôuwe dich in gote.'  
 Pantalêôn, der Sælden bote,  
 gap im der rede antwürte dô.  
 'nû sint ouch ir in gote frô,  
 vil sælic herre mîn' sprach er: 175  
 'sîn gnåde fröuden iuch gewer  
 mit liebe sunder ende.'  
 sus bôt im sîne hende  
 149<sup>b</sup> der priester dô mit witzen.  
 er hiez in nider sitzen 180  
 vil nâhe sîner sîten.  
 si wurden bî den zîten  
 mit einander redehaft.  
 sich huop ein trûtgeselleschaft  
 unde ein kôsen under in. 185  
 des wart ir heil und ir gewin  
 von gote sît gemêret.  
 der priester wol gelêret,  
 geheizen Ermolâus,  
 sprach ze deme kinde alsus. 190  
 'sage mir, trûtgeselle, nû,  
 von welher künste lernest dû?  
 waz ist dîn leben und dîn ê?  
 wie dîns gelouben orden stê,  
 daz tuo mir hie mit rede schîn. 195  
 den namen und daz künne dîn,  
 gar willeclîche ich daz vernime.'  
 'trûtherre' sprach der knabe zime,  
 'Pantalêôn bin ich genant,  
 und ist daz herze mîn gewant 200  
 ûf hôher arzenie list.  
 mîn vater noch ein heiden ist

167. wenne      170. ze einem mal      173. antwurt      186. war  
 193. ist *fehlt*.

	PANTALEON.	201
	und was getouft diu muoter mîn.	
	diu muoz erstorben leider sîn	
	und ist nû lange tôt gelegen.	205
	ich ger der hôhen künste pflegen	
	diu siechen heilet unde nert.	
	ob mir diu sælde wirt beschert	
	daz ich si wol gelerne,	
	sô tribe ich si vil gerne.'	210
	Des antwurt ime der priester wîs,	
	'kint' sprach er, 'daz dû sælic sîs,	
	wiltû der arzenie gern	
	diu sieche liute kan gewern	
149°	gesuntheit unde geniste,	215
	sô kêre dich ze Criste	
	und wirt an in geloubehaft.	
	er lèret dich die meisterschaft	
	diu manegem hilfet für den tôt	
	der in vil herzeclicher nôt	220
	gedorret unde geswarzet.	
	er ist der oberste arzet	
	der eines blinden ougen	
	erliuchten kunde tougen	
	und die tôten tete erstân.	225
	er lie den betterisen gân	
	mit sîner helfe ræten.	
	dar zuo kund er verstræten	
	daz bluot dem armen wîbe	
	und half ir siechem lîbe	230
	daz er von sîner suht genas.	
	Asclêpius und Ypocras,	
	die der keiser ruofet an,	
	die sint ein wiht, wan dir enkan	
	ir trôst gehelfen noch gefromen.	235
	dû solt ûz ir gebote komen	
	und êre Crist, der megede kint.	
	swaz abgote ûf erden sint,	

206. ger *fehlt*. 207. heilen 219. manigen 225. tete *fehlt*.  
231. ascalapines, und vorher Asch *getilgt*: *vergl.* 1065. 233. ruofte  
an sich

- die lânt sich alle vinden toup.  
 ir helfe swinet als ein stoup 240  
 den starke winde rüerent  
 und in mit sturme füerent  
 über tal und über berc.  
 geloube an keines menschen werc  
 und lâ dich gerne toufen; 245  
 sô mahtû sælde koufen  
 und êweclicher wunne lôn.  
 die lêre enphie Pantalêôn  
 in sîn gemüete dô mit kraft,  
 alsam ein erde wuocherhaft 250  
 149<sup>d</sup> enphâhet guoten sâmen,  
 swenn ir beginnet râmen  
 mit sîner sæte ein ackerman.  
 sîn edel herze daz enbran  
 und wart von gotes geiste 255  
 reht als ein fiures gneiste  
 entflammet unde schône enzunt.  
 ûf tet er sînen kiûschen munt  
 gezogenlichen unde sprach  
 'des selben dinges mir verjach 260  
 mîn muoter daz ir hânt gesaget.  
 dâ von mir deste baz behaget  
 iuwer lêre und iuwer bete.  
 si dünkent mich süez als ein mete,  
 wan ich si gerne ervüllen wil 265  
 mit werken iemer âne zil.'  
 Hie mite was diu rede hin  
 die si dô triben under in  
 \*  
 Pantalêôn der kêrte sich 270  
 ze schuole sam er tet dâ vor.  
 im was durch sîner ôren tor  
 geslichen ûf des herzen grunt  
 der rât den ime der priester kunt  
 gemachet hete bî der frist. 275

252. swer ir    260. mich    261. ir] ir mir    262. deste] daz  
 269. 270. Phanthaleon kerte sich Alsamich sage vñ och sprich

PANTALEON.

203

versigelt wart der süeze Crist  
mit kunst in sîn gemüete dô.

nû kam ez zeiner zît alsô

daz der junkherre wol getân

ze sîme meister solte gân :

280

dô sach er an der strâze ligen

ein kint daz nider was gesigen

von herzelicher swære.

sîn nôt schein angestbære,

wan ez was umbevangen

285

mit eime grôzen slangen ;

der hete umb ez geslozzen sich.

150<sup>a</sup> dâ von sîn marter grimmelich

erschein und al sîn ungemach.

nû daz Pantalêôn gesach

290

daz kint alsus beswæret,

dô wart an ime bewæret

milt unde erbarmeherzekeit.

des Kindes marter was im leit,

wan er begunde tougen jehen

295

‘noch hiute sol mîn ouge gesehen

ob Ermolâus hât geseit

von Criste mir die wârheit :

ich wil versuochen sîne kraft.’

sus gie der knappe tugenthaf

300

dar nâher zuo dem kinde.

die blanken hende linde

zein ander leite er unde vielt,

sîn ougen er ze gote ûf hielt

mit innecllichem muote.

305

‘Crist herre’ sprach der guote,

‘lâ dine gnâde werden schîn.

sît daz dû mit der krefte dîn

maht heilen blinden unde lamen,

und der tôte in dîme namen

310

vil schiere wirt erquicket,

sô werde ouch hiute entstricket

diz kint von sime twange,  
 sô daz der veige slange  
 zerbreche und ouch zerspringe 315  
 und ez niht langer twinge  
 mit sîner grimmen krefte.  
 entlœse im unde enthefte  
 den lîp von dirre marter,  
 durch daz ich deste harter 320  
 geloube an dine gottheit.  
 bewære ob mir sî wâr geseit  
 150<sup>b</sup> unde erzeige dine kraft,  
 dar umbe daz ich diensthaft  
 dir welle sîn ûf erden 325  
 und ich dir müeze werden  
 vil undertænic mîniu jâr.  
 unt wirt daz offenlîche wâr  
 daz Ermolâus seite mir,  
 sô diene ich êweclichen dir 330  
 durch diner hôhen tugende reht.  
 vernim mich armen, dinen kneht,  
 unde erhœre mich zehant,  
 alsô daz dirre serpant  
 diz kint niht langer drücke. 335  
 zerspringet er in stücke,  
 sô weiz ich wol daz din gewalt  
 ist vorhtesam und manievalt.  
 Nû der vil reine guote  
 mit durnehtigem muote 340  
 die rede und disiu wort getete,  
 dô wart erhœret an der stete  
 sîn flêhelîchiu stimme.  
 der slange unmâzen grimme  
 begunde sich entheften 345  
 und wart von gotes kreften  
 zerteilet und zerschrenzet  
 und alsô vaste entgenzet  
 daz er in kleiniu stûppe spranc

	PANTALEON.	205
	und daz kint niht mære twanc	350
	daz dô vil schône wart gesunt	
	und dannen kêrte bî der stunt	
	als ime nie leit erswære.	
	diz zeichen offenbære	
	daz wolte got erscheinen	355
	durch sînen kneht den reinen	
	der ungetoufet dannoch was.	
	und dô daz arme kint genas	
150°	durch Pantalêônes bete,	
	und er an im erkennet hete	360
	diz zeichen und diz wunder,	
	dô seite er dô besunder	
	lop und prîs dem werden gote.	
	er dankte sêre sîme gebote	
	und îlte zErmolâo.	365
	waz ime geschehen wære dô,	
	daz tete er ime mit rede erkant	
	und hiez sich toufen alzehant.	
	Diz wart getân vil schiere dô.	
	der priester wart der sælden frô	370
	daz got durch in besunder	
	diu zeichenlichen wunder	
	dem kinde erôuget hæte.	
	Pantalêôn der stæte	
	mit gotes geiste erfüllet wart.	375
	wie von der heidenischen art	
	sîn vater würde enbunden,	
	dar zuo wart bî den stunden	
	der jûngelinc gedankhaft.	
	er leite dar ûf sîne kraft	380
	in herzen unde in muote	
	daz in der reine guote	
	bekêren möhte bî der vrist	
	alsô daz er den wâren Crist	
	in sîn gemüete næme	385
	und von den goten kæme	

352. Vû da man k.      358. dô *fehlt*.      365. zû ermolao  
367. reden      372. Die zeichenliche      381. herze      384. ware

der ungetouften heiden.  
 den herren wol bescheiden  
 berespen er begunde.  
 er sprach ûz wisem munde 390  
 'wie füeget sich daz, vater mîn,  
 daz die vertânen gote dîn  
 sô rehte wandelbære sint?  
 si dünkent mich toup unde blint  
 150<sup>d</sup> an kreften unde an witzen. 395  
 man siht ir einen sitzen,  
 swenn alle zît der ander stât,  
 und der sich dâ gesetzet hât,  
 des lîp enkan niht ûf gestân,  
 noch mac der stânde niht gehân 400  
 die maht daz er gesitzet nider:  
 in beiden sint lîp unde lider  
 kreft unde lebender tugende blôz.  
 ez ist ein missewende grôz  
 daz iemen an die touben 405  
 abgote wil gelouben  
 den alliu stiure ist gar benomen.  
 swaz niht im selben mac gefromen,  
 wie kunde mir gehelfen daz?  
 man sol den goten sîn gehaz 410  
 die menschen lîp gewirket hât.  
 wer wolde sîner hantgetât  
 die wirde bieten alle stunt  
 daz ir sîn opher würde kunt  
 und er si lobte als einen got? 415  
 ez ist ein üppiclicher spot  
 daz man ein werc sol ane beten  
 daz abe der stete niht mac getreten  
 einen fuoz noch einen schrit.  
 daz niht gerüeren kan diu lit, 420  
 als dine gote, vater mîn,  
 daz mac wol ein gestüppe sîn.'  
 Der herre des antwürte bôt.  
 'sun' sprach er, 'dû hæst mich ze nôt

	PANTALEON.	207
	mit dirre teidinge brâht.	425
	mîn herze ist niht sô wol bedâht	
	daz ich gantwürten künne dir.	
	dîn rede ist gar ze swære mir	
	und alze starc diu frâge dîn,	
	wan ich an deme gelouben mîn	430
151	von dîner worte lère	
	beginne wanken sêre	
	und vaste zwîvelhaft bestân.	
	ein rede ist von dir hie getân	
	diu mînen wîzen ist ze grôz.	435
	mit disen worten ime entslôz	
	der vater und tet ime kunt	
	daz gotes geist in hete enzunt	
	und sîn gemüete erlûhte.	
	den jûngelinc bedûhte	440
	schier an des alten bihte	
	daz er in möhte lîhte	
	gewîsen von der heidenschaft.	
	sît er ein wênic zwîvelhaft	
	an deme gelouben sîn bestuont,	445
	als alle die vil schiere tuont	
	die von ir orden wellent gân,	
	sô kunde sich des wol verstân	
	Pantalêôn der wîse	
	daz er sanft unde lîse	450
	bekêret wûrde und überredet.	
	swer zwîvel in sîn herze ledet	
	mit sinne und mit gedanken,	
	der wil ouch lîhte wanken	
	von sîner ordenunge.	455
	daz hete wol der junge	
	Pantalêôn erkennet.	
	Eustorîus enbrennet	
	was von gotes geiste dô.	
	des wart in sîme herzen vrô	460
	sîn lieber sun vil drâte,	

425. redinge

446. Also

438. Dez g. g. hette in ime entzvnt

453. sinnen 457. Der h.

444. enwenig



durch daz von sîme râte  
 der herre solte werden  
 gereinet ûf der erden  
 von allem itewîze. 465  
 er warp mit hôhem flîze  
 151<sup>b</sup> und leite dar ûf sînen pîn  
 daz dô die valschen gote sîn  
 der vater hieze brechen.  
 jedoch wolt er niht sprechen, 470  
 wan er mit leiden mæren  
 getorste niht beswæren  
 den herren missewende bar,  
 ê daz er in bekêrte gar  
 ze cristenlichem orden. 475  
 er dâhte 'swenne er worden  
 ist ein durnehtic cristen,  
 so enlâze ich in niht vristen  
 sîn abgote langer mê,  
 wan ich und er tuont in sô wê 480  
 daz wir si brechen beide  
 und werfen si mit leide  
 für daz hûs und abe der stete.'  
 Pantalêôn die rede tete  
 vil tougen und vil stille. 485  
 ze gote stuont sîn wille,  
 wan er in sîme geiste bran.  
 nû was ein liehtelôser man  
 ze Rôme sunder 'lougen  
 der niht an beiden ougen 490  
 moht einen bœsen stich gesehen.  
 er hôrte sprechen unde jehen,  
 Pantalêôn der wære  
 ein arzât sô gewære  
 daz er mit sînen listen 495  
 kûnd alle siechen fristen  
 von schedelicher swære.  
 im wart geseit ze mære  
 daz er mit sîme trôste

478. in *fehlt*.

479. apgötten

491. Einen b. stick niht mühte g.

	PANTALEON.	209
	daz arme kint erlôste	500
	von deme unreinen slangen	
151°	dâ von kam er gegangen	
	ze sime hûse drâte.	
	nâch wiser liute râte	
	wart er für in geleitet.	505
	dâ von was ime bereitet	
	helf unde trôst vil schiere.	
	Pantalêôn der ziere	
	liez im dô guoten rât geschehen.	
	wan dô er in begunde sehen,	510
	dô sprach im der getriuwe zuo	
	‘waz wiltû, friunt, daz ich dir tuo?’	
	Des antwurte ime der blinde.	
	ze deme erwelten kinde	
	sprach der lichtelôse kneht	515
	‘ich suoche dîner gnâde reht	
	und dinen helfelichen trôst,	
	sô daz ich armer werde erlöst	
	von mîner siechen blintheit	
	und ich von dîner tugende breit	520
	mîn licht müeze wider hân.	
	mit arzenie ich hân vertân	
	mîn guot und alle mîne habe.	
	mir hât vil manic arzât abe	
	gebrochen swaz ich hæte,	525
	und hânt mich sîne ræte	
	geholffen harte kleine doch.	
	ich hete ein wênic lichtes noch:	
	daz selbe ist mir benomen gar.	
	ich bin des guotes worden bar	530
	und der gesichte leider:	
	der tâten vrî mich beider	
	die meister mit ir lêre.	
	dâ von beganc dîn êre	
	an mir und dîne sælekeit.	535
	sît daz ein wunder sî geleit	

510. dô *fehlt*.

515. der lichtloser

523 *nach* 524.

526. hat

Z. F. D. A. VI.

an dich von hôher künste,  
 sô lâ von dîner gûnste  
 151<sup>d</sup> die grôzen sælde mir geschehen  
 daz ich müge den tac gesehen.' 540  
 Pantalêôn sprach aber dô  
 'war umbe sol ich machen vrô  
 mit mîner helfe dînen muot,  
 sît dû deheiner slahte guot  
 ze lône maht gegeben mir? 545  
 waz miete enphienge ich nû von dir,  
 und wûrdestû gesehende?  
 dû wære mir verjehende  
 dû habest dîne habe verzert  
 und habest dich doch niht genert 550  
 mit arzetuome, als ich vernime.'  
 'trûtherre' sprach der blinde zime,  
 'daz selbe kleine gûetelîn  
 daz noch in deme gewalte mîn  
 beliben sî, daz soltû nemen, 555  
 durch daz dû lâzest mir gezemen  
 helf unde dîne stiure.'  
 'nein' sprach der knabe gehiure,  
 'ich enger dîns guotes niht.  
 swaz dû habest in dîner phliht, 560  
 daz gip enwec den armen.  
 dîn breste sol erbarmen  
 den wâren unde den süezen Crist.  
 der machet dich in kurzer vrist  
 gesehende sunder lougen 565  
 und reinet dir dîn ougen  
 von lichtelôser blintheit.  
 sîn helfe wirt an dich geleit  
 und sîn genædeclicher trôst,  
 sô daz dû schaden wirst erlöst.' 570  
 Der rede wart der blinde vrô.  
 Pantalêônes vater dô  
 gedâhte wie daz mûhte sîn

540. den tag müge    547. Vn̄ w. von mir gesehen    548. Du hast  
 doch mir hie veriehen    550. Vn̄ enhast    557. Dine helfe    560. dine



- daz dirre man gesihte bar  
 152<sup>b</sup> gewinnet ougen lichtgevar  
 unde gesehede schône wirt.  
 Krist Jêsus ime die helfe birt  
 mit hôhen kreften ûz erlesen 615  
 daz er vil schiere sol genesen.’  
 Mit disen worten unde alsô  
 der gotes wunderære dô  
 greif an des blinden ougen.  
 er liez ze himele tougen 620  
 erhellen sîner stimme dôn.  
 der jüngelinc Pantaleôn  
 begunde sprechen disiu wort.  
 ‘got herre der ze himele dort  
 unde ûf êrden hâst gewalt, 625  
 lâ dîne güete manicvalt  
 und dîne gnâde werden schîn.  
 sît daz dû mit der krefte dîn  
 die vinsternisse erliuhten maht,  
 sô tuo dîn wunder maneger slaht 630  
 den liuten offenbære.  
 erzeige in unde bewære  
 daz dîn almehtic gottheit  
 sich lâze krefte unde breit  
 an allen steten vinden. 635  
 erliuhte disem blinden  
 sîn ougen ungesihtec,  
 dureh daz man werde gihtec  
 dir manicvalter werde.  
 geruoche sîne girde 640  
 und mîne bete erhœren,  
 sô daz dû wellest stœren  
 sîn leit daz ime dâ wirret.  
 sîn licht daz ime verirret  
 von touber missewende sî, 645  
 daz mache im lûter unde frî  
 152<sup>c</sup> vor wandelbæren dîngen ;

PANTALEON.

213

sò mac dîn lop erklingen  
und wirt dîn name erhœret.  
lâstû sîn leit zerstœret  
von dîner helfe werden,  
sò prîset mân ûf erden,  
got herre, dîne magenkraft,  
diu starc ist unde sigehaft.'

650

Mit dirre flizeclichen bete  
Pantalêôn enfrôuwet hete  
den liehtelôsen drâte.

655

von sîner helfe râte  
sîn ougen wurden ûf getân.  
daz lieht begunde er wider hân  
daz ime dâ vor gezûcket was.

660

gar lûter sam ein spiegelglas  
wart ime gemachet sîn gesiht.  
dâ von sûmt er sich langer niht,  
er seite prîs dem werden gote.  
der tugende dankte er sîme gebote  
daz im sîn ungemach verswein.  
mit frôuden kêrte er wider hein  
schôn unde wol gesehende.

665

des wart man lobes jehende  
Pantalêône hî der zît.

670

vil maneger sprach enwiderstrît  
daz er benamen wære  
ein arzâthelfære

unde ein meister ûz erkorn.

675

sîn werder vater hôchgeborn  
sich frôute sîner werdekeit.  
sîn muot ganzlichen wart geleit  
an Jêsum Crist den reinen,

wan er begunde meinen

680

sunder allen wandel in.  
sîn sun und er die kêrten hin  
ze priester Ermolâô.

152<sup>d</sup> dem seiten si ze mære dô

650. sin lieht zerstören      664. sumet sich      672. im widerstrit  
682. er kerte h.

- daz wunder daz dô was geschehen. 685  
 wie got den blinden lie gesehen,  
 daz wart im dô gekündet.  
 des wart sîn muot durchgründet  
 vil gar mit fröude rîcher art.  
 Pantalêônes vater wart 690  
 von ime getoufet bî der zît.  
 ze sîme hûse giengen sît  
 die gotes trûten alle drî.  
 daz wart gereinet unde frî  
 vor wandelbæren sachen, 695  
 wan si begunden swachen  
 die valschen gote sîn iesâ.  
 die brâchen si ze stûcken dâ  
 noch liezen si niht ane beten.  
 si wurden in daz hor getreten 700  
 und ûz dem hûs gescheiden.  
 der priester disen beiden  
 daz beste willeclichen riet.  
 sîn rât sun unde vater schiet  
 von aller zwîvelunge, 705  
 wan sîn erweltiu zunge  
 lie si vil tugende merken.  
 ir muot began sich sterken  
 an cristenlichem orden.  
 si wâren schiere worden 710  
 durch sîne wîsen ræte  
 an deme gelouben stæte.  
 Si lobeten Krist ân allen mein.  
 ir muot an ime durliuhtic schein  
 als ein cristalle bî der zît. 715  
 Pantalêônes vater sît  
 nam ein vil sælic ende.  
 ân alle missewende  
 153<sup>a</sup> gelac der edele herre tôt.  
 den geist den sante er unde bôt 720  
 mit fröuden in den himeltrôn.

PANTALEON.

215

und dô sîn guot Pantalêôn  
besaz und alle sîne habe,  
dô lie der tugende rîche knabe  
zeslîfen sîn gesinde.

725

von dem erwelten kinde  
den knechten wart gelônnet wol.  
er schiet si von im liebes vol  
und fröuden rîches muotes.

730

daz ander teil des guotes  
daz im über was beliben,  
daz wart nâch sâlden ouch vertriben,  
wan er gap ez den armen  
und lie sich gnuoge erbarmen  
die dâ gevangen lâgen  
durch daz si rehtes pflâgen  
und Jêsum Crist an riefen.  
er sante in zuo den tiefen  
kerkâren sîne spîse.

735

Pantalêôn der wîse  
die siechen wol beruochte.  
swer sîne helfe suochte,

740

der wart zehant von ime ernert.  
den blinden wart sîn trôst beschert  
unde den krumben unde den lamén.  
er heiltes alle in Cristes namen  
die für in kêrten ungesund.

745

gesuochet wart dô bî der stunt  
kein ander meister wan eht er.  
des truoc vil grimmes herzen ger  
und einen vîentlichen sîn  
vil manic arzât wider in.

750

Die meister alle von der stift  
die kâmen ûf des nîdes trift

153<sup>b</sup> daz sîn begunden hazzen.

755

sich huop in einer gazzen  
ir samenunge an eime tage,  
alsô daz si mit leides klage



- zein ander kâmen von geschiht  
 und unberedet liezen niht 760  
 daz in sô grôzen schaden tete  
 Pantalêôn an maneger stete  
 dâ si gewinnes solten pflegen.  
 in allen ûf der strâze wegen  
 der man begegente alzehant 765  
 ûf den Pantalêôn gewant  
 het alsô helfe rîchen trôst  
 daz er mit sîme râte erlöst  
 von sîner blintheite wart.  
 nû daz die meister ûf der vart 770  
 den selben man gesâhen,  
 dô sprâchens unde jâhen  
 'diz ist der man der ê was blind  
 und den Pantalêôn daz kint  
 ernerte mit der helfe sîn. 775  
 er hât nû glanzer ougen schîn  
 und was im ê sîn lieht benomen.'  
 sus hiezens in dar nâher komen  
 und für sich gân des mâles hin.  
 si sprâchen alle wider in 780  
 'friunt, wirt uns hie verjehende,  
 wer machte alsus gesehende  
 mit sîner hôhen stiure dich?'  
 'Pantalêôn generte mich'  
 sprach er dô sunder lougen, 785  
 'wan er zwei lûter ougen  
 her wider gap mit helfe mir.'  
 'waz arzenîe tete er dir'  
 begunden si dô sprechen,  
 'dâ mite er dich gerechen 790  
 an der gesihten machte alsô?'  
 153° des antwurte er in aber dô  
 gezogenlichen unde sprach  
 'swaz râtes mir von ime geschach,  
 dar zuo leit er deheinen list, 795

wan daz er bat den süezen Crist  
 daz er mir helfe tæte schîn.  
 er ruorte in deme namen sîn  
 mîn ougen beidiu mit der hant.  
 dâ von ich die genâde vant  
 daz ich von mîner blinden art  
 durch sîn gebot erlæset wart.'

800

Diz mære in allen misseviel.  
 ir nîdic muot in zorne wiel  
 ûf den vil reinen jüngelinc  
 der sô genisbærlichiu dinc  
 dem siechen lie dô werden schîn.  
 si sprâchen 'zwære, sol er sîn  
 iht lange in dirre guoten stat,  
 er tuot uns alle an êren mat,

810

wan er uns wirde roubet.  
 daz volc an in geloubet  
 und hât der gote kunst für niht.  
 swer disen hœret unde siht  
 den er gesehende mahte,

815

der hât ûf uns kein ahte  
 und ruochet unser kleine.  
 wir sulen alle gemeine  
 dem keiser von im künden  
 daz er mit valschen fünden

820

sô fremdez wunder üebet.'  
 sus giengen si betrüebet  
 dô für Maximîanen.

ûf den vil wol getânen  
 ir nîdic muot in zorne bran.  
 dô si den keiser blikten an,

825

153<sup>d</sup> dô sprachen alle wider in

'die gote lîdent ungewin,  
 den briuwet in Pantalêôn.

er krenket vaste ir lobes dôn  
 und swechet in ir werdekeit.

830

wan swen dû, herre, hâst geleit

807. Die siech  
 829. Die br.

811. wirder

814. disen man hœret

- in dîn gebende durch daz er  
 ze Kriste kêret sîne ger,  
 den spîset er mit sîner habe. 835  
 daz er die mit trôste labe  
 die dîn gebot versmæhent hie,  
 des flîzet er sich, wande er nie  
 den goten wolte bî gestân.  
 er hât vil wonders hie getân 840  
 mit zouber daz er trîbet.  
 ist daz er hie belîbet  
 und niht hinnen wirt gejaget,  
 daz volc an dîner ê verzaget  
 und wirt an Crist geloubhaft. 845  
 sîn rât mit valscher meisterschaft  
 unbilde kan verenden.  
 lâ, herre, den besenden  
 den er gesehende mahte,  
 durch daz dû maneger slahte 850  
 getiusche an ime beginnest sehen,  
 wan ez von gougel muoz geschehen  
 daz er die siechen alle stunt  
 mit sîner helfe tuot gesunt.  
 Dem keiser was diu rede leit. 855  
 er hiez in sîner grimmekeit  
 den man für sich besenden  
 der von des knaben henden  
 sîn lieht vil schiere wider nam.  
 und alsô er ze hove kam 860  
 mit unverzagtes herzen ger,  
 dô sprach der keiser 'bistû der  
 154\* der von Pantalêône  
 gesehende wart vil schône  
 und ein sus klârez lieht gewan?' 865  
 'jâ, herre' sprach der guote man,  
 'ich bin der sunder lougen  
 dem er zwei lûter ougen  
 mit sîner helfe hât gegeben.

838. geben  
865. und fehlt.

839. sinen

851. beginnest an ime s.

## PANTALEON.

219

sîn rât mir lip herz unde leben 870

genædeclîche machte vrô.'

'nû sage mir' sprach der keiser dô,

'wie machte er dich gesunthaf?

hât er dich mit der gote kraft

alsus erliuhtet oder wie?' 875

'nein' sprach er, 'dine gote nie

gehulffen ime ze dirre getât

diu mich alsus erlœset hât

von der vil starken swære mîn.

wie solten mich die gote dîn 880

erliuhten mit ir stiure,

sît daz in allen tiure

lieht unde lûter ougen sint?

swaz selbe toup ist unde blint,

wie möhte mir daz iht gefromen? 885

mir hânt die meister abe genomen

mîn guot mit arzenie gar,

alsô daz ich ir helfe bar

gestuont an beiden ougen doch.

ich hete ein wênic liehtes noch: 890

daz nâmen si mir unde den lôn.

dô nerte mich Pantalêôn,

als ez gebôt sîn herre Crist,

der gotes sun von himel ist

und wonders vil begangen hât. 895

er lât an ime sîn hantgetât

rîlîche stiure vinden.

die lamen und die blinden

154<sup>b</sup> mac heilen sîn vil starc gebot,

wan er ist ein almehtic got, 900

der wazzer fiur luft erden

und alliu dinc liez werden.'

Der keiser zallen orten

wart sêre von den worten

erzûrnet alse ein tobic hunt. 905

mit grimme sprach er sâ zestunt

870. mir] min 879. starker 880. der g. 882. daz *fehlt*.

883. unde] von 895 *nach* 896. 897. Rigeliche 900. ein *fehlt*.

- 'alrest prüef ich die wårheit.  
 swaz mir nû lange wart geseit  
 von Pantalêône,  
 des bin ich komen schône 910  
 zeim ende nû bî dirre frist.  
 sîn gougel und sîn zouberlist  
 den goten vil geschadet hât.  
 der disen menschen leben lât  
 der von der helfe sîn gesiht 915  
 und in zehant verderbet niht,  
 mîn volc daz wirt bekêret,  
 wan ez mit opher êret  
 deheinen got von mîner ê.  
 man sol niht langer unde mê 920  
 genesen lâzen disen man,  
 der ein urkûnde geben kan  
 daz er gesehene worden si.  
 nû machent in bar unde frî  
 des lîbes unde des lebetagen.' 925  
 seht, alsô wart im abe geslagen  
 daz houbet bî den stunden.  
 des wart sîn sêle funden  
 schier in dem paradîse.  
 Pantalêôn der wîse 930  
 rîlichen solt ze lône gap,  
 daz er in sînes vater grap  
 verborgenlîche wart geleit.  
 der im den lîp ze tôde sneit  
 154<sup>c</sup> und ime dà sluoc daz houbet abe, 935  
 der truoc in selbe hin ze grabe,  
 durch daz man gap im tiuren lôn.  
 dar nâch wart Pantalêôn  
 hin zuo dem keiser ouch besant.  
 er kam dô für in alzehant 940  
 gegangen ûf den palas.  
 daz er vor ime verleidet was,  
 dar ûf aht er vil kleine.

915. geschiht

916. in *fehlt*.

923. gesehen

936. hin *fehlt*.

940. dar kam

942. von

	PANTALEON.	221
	der gotes kemphe reine	
	die marter liden wolte	945
	durch daz er tragen solte	
	der sigenünfte palmen.	
	er sprach zehant den salmen	
	ûf riches lones zuoversiht.	
	‘mîn lop verswic, got herre, niht;	950
	dû mache ez offen unde kunt,	
	wan die sündære hânt ir munt	
	durch haz entslozen über mich.	
	mit nîdes Worten vîentlich	
	hânt mich bevangen übele man	955
	die mich vergebene strîtent an.’	
	Den salmen der getriuwe sprach.	
	der keiser in dô komen sach	
	mit willeclîches herzen ger.	
	‘dû bist Pantaleôn’ sprach er:	960
	‘dar umbe entsliuz die rede mir	
	ob daz sî wâr daz ich von dir	
	nû lange zît vernomen hân.’	
	dô sprach der knappe wol getân	
	‘waz hât man dir von mir gesaget?’	965
	‘mir hânt die meister hie geklaget’	
	sprach aber zime der heiden arc,	
	‘daz dû mit zouberie starc	
	den goten vil geschadet habest,	
	und daz dû fuorest unde labest	970
154 <sup>d</sup>	vil manegen den ich heize queln.	
	ich hœre sprechen unde zeln,	
	swer lige in minen banden,	
	daz dû mit dînen handen	
	den salbest unde heilest.	975
	dû fröuwest unde ergeilest	
	die kristen algemeine,	
	die mînen goten reine	
	ze lobelichen dingen	
	niht ophers wellent bringen.’	980

- Des antwurte ime Pantalêôn.  
 er lie vil süezer stimme dôn  
 erklingen von dem munde sîn.  
 er sprach 'die valschen gote dîn  
 die spulgent snæder meisterschaft. 985  
 den himel kunde niht ir kraft  
 geschepfen noch dis erden.  
 hie sol erzeiget werden  
 waz ûf si tugende sî gewant.'  
 'wie mac daz werden uns bekant?' 990  
 sprach aber dô Maximiân.  
 'dâ solt dû für dich bringen lân  
 bald einen siechen man' sprach er.  
 'heiz einen betterisen her  
 vil schiere dînsen unde tragen 995  
 des lîp von sînem siechetagen  
 niht gerüeren künne sich.  
 sô der gefüeret sî für dich  
 und dû beschouwwest sînen pîn,  
 sô lâ zehant die priester dîn 1000  
 al dîne gote schrien an  
 daz si dem lidesiechen man  
 hie wider geben sîne genist.  
 dar zuo sô wirt mîn herre Crist  
 von mir gevlêhet ouch zestunt 1005  
 daz er in mache wol gesunt  
 155<sup>a</sup> und ime rehtiu lit beschere.  
 swer denne sînen lîp genere  
 und in erfrouwe ân allen spot,  
 den êre man für einen got 1010  
 der starc ist unde sigehaft.  
 ist daz im dîner gote kraft  
 gebieten mac gesuntheit,  
 sô werde ir lop wît unde breit  
 gemachet ûf der erden. 1015  
 mûg aber er niht werden  
 genert durch dîner gote list,

und heilet in min herre Crist,  
 sô lâ dîn ê versmæhet sîn  
 und üebe den gelouben min 1020  
 der alse ein rehter orden  
 bewæret denne ist worden.'

Maximîân der keiser,  
 âmehtic unde heiser  
 an cristenlicher sælekeit, 1025  
 liez ime niht sîn die rede leit,  
 wan im diu wort gevielen wol.  
 er sprach 'jâ wil ich unde sol  
 hie volgen dîme râte.'

sus hiez er für in drâte 1030  
 dô bringen einen menschen lam.

der wart getragen unde kam  
 ze hove in sînem bette swach.  
 dô von der übele heiden sprach  
 dem wîsen jüngelinge zuo 1035

'den goten kunt dis êre tuo  
 daz wir von êrste ir kraft gesehen.  
 und sô daz denne sî geschehen  
 daz ir gewalt versuochet ist,  
 sô lâz erkennen waz dîn Crist 1040

mit helfe rîchen henden  
 hie wunders müge verenden  
 an deme vil siechen manne.

155<sup>b</sup> swer in geheile danne,  
 der sî geprîset iemer mê.' 1045

Pantalêôn sprach 'diz ergê  
 nâch dînes herzen muote gar.'  
 sus hiez dô sîne priester dar  
 der keiser îlen zeme lamen.

er sprach daz si der gote namen 1050  
 sêr unde lûte riefen an,

durch daz si deme vil siechen man  
 benæmen dâ sîn ungemach.  
 diz wart getân und diz geschach.

1018. heile 1030. für in] bringen 1038. denne sî] dine ist

1040. erken 1054. vā sprach mit *übergeschriebenem* diz.



si wurden alle bi der zît 1055  
 gar inneclichen an geschrît;  
 daz wênic half den betterisen.  
 der eine den, der ander disen  
 begunde tiure dô beswern  
 daz si den siechen man gern 1060  
 geruochten ûf dem palas.  
 her Galliën und Ypocras  
 vil maneger hande bete liden.  
 ouch hôrte man genuoge biten  
 Asclêpiûm der bete sîn. 1065  
 dô wart ein lût gebrehte schîn  
 von maneger stimme schalle.  
 swaz si geriefen alle,  
 daz was ein üppeclich geschrei.  
 den lamén half niht umbe ein ei 1070  
 swaz bete umb in aldâ geschach.  
 und dô Maximîân ersach  
 daz von den goten bi der stunt  
 niht wart der sieche man gesunt,  
 dô wart Pantalêôn zehant 1075  
 von ime geheizen unde gemant  
 daz er dâ bæte Jêsum Krist  
 daz er geruochte sînen list  
 155° an deme vil siechebæren  
 1080 erzeigen unde bewæren.  
 Pantalêôn der guote lie  
 dô nider sich ûf sîniu knie  
 diemüeteclichen alzehant.  
 der süeze Crist von ime gemant  
 wart inneclichen bi der stunt. 1085  
 sîn kiuscher und sîn rôter munt  
 alsus begunde sprechen zim.  
 'got herre, mîn gebet vernim  
 unde erhœre mîniu wort.  
 ûf dîne hôhen himele dort 1090  
 lâ mine stimme komen ze dir.

1057. gestrit  
 gvnde alsus

1069. ein *fehlt*.

1083. Die mûterlich

1088. Be-

- dîn bilde kêre niht von mir  
 und neige mir daz ôre dîn,  
 swenn ich dir klage die swære mîn  
 und mich grôz angest twinge. 1095  
 dar umbe daz erklinge  
 lop unde prîs dem dînen namen,  
 sô tuo gesunt hie disen lamen  
 und lâ bewæren dîn gebot  
 daz âne dich kein ander got 1100  
 ze himele noch ûf erden ist.  
 erzeige an ime, vil sûezer Krist,  
 die manicvalte sterke dîn.'  
 hie mite er bôt die hende sîn  
 dem betterisen unde sprach 1105  
 'stant ûf ân allez ungemach  
 in Cristes namen unde ganc  
 alsô daz dîniu lider kranc  
 von sîner helfe sîn gesunt.'  
 ûf machte sich dô bî der stunt 1110  
 der sieche ân allen smerzen.  
 an liden unde an herzen  
 was er gerech dô worden,  
 dâ von der cristen orden  
 115<sup>d</sup> vil sêre wart gemêret. 1115  
 vil heiden wart bekêret  
 die sich geswinde touften  
 und mit ir marter kouften  
 den êweclichen gotes lôn.  
 sus hæte dô Pantalêôn 1120  
 gewonnen manege sêle gote  
 die der keiser mit gebote  
 lie von dem lîbe scheiden.  
 die touben argen heiden  
 Pantalêône wurden gram. 1125  
 nâch sîme schaden freissam  
 wolt ir gemüete sich dô sênen,  
 wan si begunden mit den zenen

1097. dem dînen] dime 1109. si

- ûf in grisgramen alzehant.  
 der keiser wart von in gemant 1130  
 ûf sînes lîbes ungewin.  
 die meister sprâchen wider in  
 'lâstû den zouberære  
 belîben âne swære,  
 sô muoz verdorben iemer sîn 1135  
 daz opher al der gote dîn,  
 wan er si wurde roubet.  
 daz volc an in geloubet,  
 und lît an im ir zuoversiht.  
 dû selbe an in geloube niht, 1140  
 wan er mit valschen sachen  
 daz wunder kunde machen  
 daz er helfe an dirre stete  
 dem ungesunden manne tete.  
 Der keiser wânde ez wære wâr 1145  
 des ime die meister offenbâr  
 verjâhen von dem guoten.  
 dem jungen rîchgemuoten  
 Pantalêône sprach er zuo  
 'friunt lieber, mînen willen tuo 1150  
 156<sup>a</sup> durch dîne lobelichen tugent.  
 erlœse dîne klâren jugent  
 von angestbâren dîngen.  
 dîn opher ruoche bringen  
 den goten algeliche, 1155  
 durch daz dû werdest rîche  
 gemachet von den henden mîn.  
 gedenke wie des tôdes pîn  
 vil maneger hât erliten hie  
 der abe den goten lobes gie 1160  
 noch in niht wolte dienen mêr.  
 dem keiser übel unde hêr  
 Pantalêôn antwürte bôt.  
 er sprach 'swer hie gelegen tôt  
 von dîner gote schulden ist, 1165

1129. in *fehlt.* 1133. disen 1136. aller der 1137. wider

1148. Die mytegen rich gemûten 1154. Gerûche dîn o. br.

- den machet dort mîn herre Crist  
mit sîner helfe lebende,  
wan er wirt im dà gebende  
fröud unde wünneclich gemacht.<sup>1</sup>  
der keiser dô mit zorne sprach 1170  
'swîc unde nenne Cristes niht.  
lâz unde mît die zuoversiht  
die dû ze sîner helfe treist.  
dû merkest doch wol unde weist  
waz durch in in kurzen tagen 1175  
noet unde pînes hât getragen  
Anthimiân der alte  
dem dû mit dîme gewalte  
sîn ougen machtest lûter.<sup>2</sup>  
der gotes kempfe trûter, 1180  
Pantalêôn, sprach aber dô  
'mîn herze ist des gedinges vrô  
daz ich die marter lîden sol.  
ich junger billich unde wol  
durch Crist vil nœte dulde, 1185  
sît daz ân alle schulde  
Anthimiân der alte leit  
156<sup>b</sup> durch in vil strenger arbeit.<sup>3</sup>  
Nû daz der keiser daz vernam  
von deme junkherren wunnesam 1190  
daz er durch allez sîn gebot  
Krist Jêsum den erwelten got  
ûz sînem muote niht enliez,  
seht, dô gebôt er unde hiez  
daz er gehenket würde enbor 1195  
und man im hinden unde vor  
mit fiure tæte unmâzen wê.  
sîn lîp reht alse ein niuwer snê  
wîz unde blanc geverwet  
wart jæmerliche engerwet 1200  
und ûf gehangen alsô blôz.  
den schaden bitter unde grôz

1177. Antinian: *geändert nach 1187. in den actis ss. Anthimus.*

1185. Crist *fehlt.* 1194. er *fehlt.*

- vil harte lützel er entsaz.  
 mit liechte manic glasevaz  
 sêr unde tobeliche enbrant 1205  
 gehenket wart umb in zehant  
 sô daz die flammen fiurîn  
 ir hitze gâben unde ir schîn  
 an sîne wünnelîchen hût.  
 Pantaleôn truoc über lût 1210  
 die marter mit geduldekeit.  
 den pîn er senfteclîchen leit,  
 wan er im harte kleine war.  
 dô man die lampen hæte gar  
 enzündet unde enbrennet, 1215  
 dô wart er frô bekennet  
 und âne leides smerzen.  
 er sante ûz sîme herzen  
 ze gote manegen siufzen tief.  
 'Crist herre' sprach er unde rief, 1220  
 'als dû mir hæst geholfen ie,  
 sus lâ mir komen aber hie  
 die helfe dîn ze trôste.  
 156<sup>c</sup> von dirre lampen rôste  
 geruoche erlôesen mîne jugent. 1225  
 durch dîne veterlichen tugent  
 mir hilf mit dîner stiure  
 von dirre liechte fiure  
 daz in den glesern ist enbrant  
 und mir vil nâhe lît gewant.' 1230  
 Nû daz er disiu wort gesprach,  
 Crist Jêsum er dô komen sach  
 in eines phaffen bilde alsus  
 als ob ez Ermolâus,  
 der reine priester, solte sîn. 1235  
 got, unser aller trehtîn,  
 sprach wider in lieplîche dô  
 'friunt guoter, wis von herzen vrô,  
 wan ich in al der nôete dîn

1221. ie] e

1222. nie

1228. liechten

1234. also

1239. aller der

## PANTALEON.

229

- wil mit dir wesen unde sîn 1240  
 alsô daz ich erlæse dich  
 von strenger swære grimmelich  
 und ich dîn angest bûeze.  
 nâch disen worten sûeze  
 die lampen und diu glasevaz 1245  
 erlâschen alliu, wizzent daz;  
 ir glenzen unde ir schîn verdarp.  
 got selber schuof daz unde erwarp  
 mit sîner gotelichen kunst  
 daz der vil heizen liechte brunst 1250  
 Pantalêone dô niht war.  
 die knehte die bekommen dar  
 durch sîne marter wâren  
 und sîn dâ wolten vâren  
 mit strenger nœte freissam, 1255  
 die wurden bî der zîte lam  
 gemachet an ir hende liden.  
 seht, alsô kunde dô bevriden  
 156<sup>d</sup> got, unser herre, sînen kneht.  
 durch sîner hôhen tugende reht 1260  
 liez er im arges niht geschehen.  
 und dô der keiser hæte ersehen  
 daz ime niht war der hitze nôt,  
 weiz got dô hiez er unde gebôt  
 daz man enbûnde sîniu lider 1265  
 und er gelâzen würde nider  
 zer erden bî der stunde.  
 ûz einem valschen munde  
 sprach er mit zorne wider in  
 'sag an, wie bistû komen hin 1270  
 der marter angestbære?  
 waz mohte vor der swære  
 dîn leben hie gefristen?  
 mit welher hande listen  
 hastû die knehte mîn erlemet 1275  
 und daz wilde fiur gezemet

daz dir sîn hitze niht enwar  
noch dir deheinen schaden bar?'

Pantalêôn antwûrte bôt

der rede. er sprach 'ze dirre nôt 1280

half mich deheiner slahte list,  
wan der getriuwe süeze Crist  
der hât mich aleine erlöst.

er ist der arzenîe trôst  
der ich ze mîner swære pflege 1285  
und hilfet mich daz ich gesige  
an dîme zorne vreissam.

er machte dîne knechte lam  
an henden unde an armen.  
die heizen und die warmen 1290  
lampen er erleschet hât.  
sîn helfe dringet unde gât  
für aller künste lère.'

von disen Worten sêre

157<sup>a</sup> Maximiân beswæret wart. 1295

durch sîne grimelichen art  
begunde er zornic schînen  
und wolte vaster pînen  
den jûngelinc an sînen liden.  
ûz îsen einen zuber smiden 1300

der ungetoufte keiser hiez.  
ein wunder blîes man zerliez  
mit fiure drinne, als er gebôt.  
und dô daz blî wiel unde sôt,  
dô wart Pantalêôn dar în 1305

durch marterlicher nœte pîn  
gesetzt nacket unde bar.  
sîn hût alsam ein snê gevar  
wart von dem heizen blîe naz  
dar inne er âne vorhte saz 1310

und engestlicher nœte frî.  
daz wallende und daz heize blî  
dûht in süez alse ein honicmete.

	PANTALEON.	231
	mit flîze sante er sîn gebete	
	ûf zuo den himelkœren.	1315
	er sprach 'geruoche erhœren,	
	got herre, mîne stimme.	
	ûz aller vorhte grimme	
	des leiden widersachen	
	soltû mich ledic machen	1320
	unde enbint die sêle mîn	
	von ime durch al die gûete dîn.'	
	Der reine marterære,	
	nû daz er ânc swære	
	ze gote dise rede getete,	1325
	dô dûhte in aber an der stete	
	daz Ermolâus kæme dà.	
	Jêsus begegente ime iesâ	
	vrœliche in sînem bilde.	
	des wart im trûren wilde,	1330
	wan Crist der guote selbe trat	
157 <sup>b</sup>	ze deme junkherren in daz bat	
	daz von dem heizen blîe sôt.	
	sîn hant er ime ze helfe bôt:	
	von der enpfîenc er stiure.	1335
	daz blî daz von dem fiure	
	wiel unde tobeliche bran,	
	daz wart erleschet unde gewan	
	Pantalêôn sîn frî gemach,	
	daz ime dô leides niht geschach	1340
	von sîner hitze manicvalt.	
	<u>er</u> wart erkûelet unde kalt	
	alsam ein sûezer meien tou.	
	dâ von den klâren niht gerou	
	sîn dienst den er Criste bar.	1345
	swer dirre zeichen wart gewar	
	diu got durch sînen willen tete,	
	den nam des wunder an der stete	
	daz er die marter überwant.	
	der keiser aber dô zehant	1350



- von zorne tobic wart gesehen.  
 er sprach 'wie mohte ez ie geschehen  
 daz er alsus genesen ist?  
 weiz iemen welher hande list  
 in lôste von der nôete? 1355  
 wâ mite ich in ertœete,  
 daz râtent al die mîne,  
 und vinden im die pîne  
 die von dem lîbe in scheiden.'  
 seht, alsô bat der heiden 1360  
 dô râtes sîne hovediet  
 diu des junkherren schaden riet  
 und sînes lîbes ungemach.  
 sîn rât der lêrte in unde sprach,  
 er solte in sunder alle wer 1365  
 versenken heizen in daz mer;  
 sô möhte er wol verderben  
 157<sup>c</sup> und müeste drinne sterben  
 vil schiere ân allen widerstrît.  
 sus fuorte man in bî der zît 1370  
 gebunden an des meres stat.  
 der keiser im dô henken bat  
 an sîne kelen einen stein  
 der michel unde grôz erschein.  
 Mit dem sô wart er in den sê 1375  
 geworfen, daz im doch niht wê  
 ze herzen noch ze lîbe tete,  
 wan im begegente an der stete  
 Crist Jêsus aber sâ zehant.  
 der het ein bilde und ein gewant 1380  
 als Ermolâus an im truoc.  
 er was gelîch dem priester gnuoc  
 an antlitze unde an kleide.  
 von sorgen und von leide  
 lôt er zehant den jüngelinc. 1385  
 an ime ein wunderlichez dinc  
 von sîner helfe dô geschach.

- der stein im abe der kelen brach:  
 von deme wart er enbunden.  
 in fuorte bi den stunden 1390  
 got, unser herre, zeme stade,  
 sô daz im keiner slahte schade  
 von deme wilden sê geschach.  
 dâ von lobt er in unde sprach  
 mit frôuden sunder smerzen 1395  
 'in allem minem herzen  
 sol ich dir bihten, herre got.  
 ich prise dîn vil starc gebot  
 und wil in mîner jâre tagen  
 dîn wunder künden unde sagen.' 1400  
 Der keiser zornic wart erkant.  
 'Pantâlêôn' sprach er zehant,  
 157<sup>d</sup> 'hât aber dir dîn zouberlist  
 geholfen daz dû komen bist  
 gesunt ûz diseme wâge?' 1405  
 der jûngelinc der vrâge  
 bôt im antwûrte sunder wân.  
 er sprach 'daz mer daz hât getân  
 daz ime gebôt sîn herre nû.'  
 'jâ' sprach der heiden, 'sô maht dû 1410  
 des wâges ouch gewaltic sîn,  
 sît daz er deme gebote dîn  
 gar undertænic worden ist?'  
 'nein' sprach er, 'der getriuwe Crist,  
 dem ich dâ diene sunder wer, 1415  
 der kan gebieten ouch dem mer  
 und disem wâge wilde.  
 sîn götelichez bilde  
 mac aller dinge hân gewalt.'  
 der keiser aber dô gestalt 1420  
 wart von der rede in tobeheit.  
 sîn grimmez herze wart geleit  
 in argen willen schiere.  
 vil engestlicher tiere

- bereiten hiez er unde bat 1425  
 den herren bringen zuo der stat  
 dâ si gesament wâren.  
 si solten sin dâ vâren  
 und in der strengen noete gewern.  
 lêbarte lœuwen trachen bern 1430  
 und maneger hande wûrme  
 lie man durch grimme stürme  
 zuo dem ûz erwelten,  
 dar umbe daz si quelten  
 vil marterliche sinen lip. 1435  
 des kâmen dar man unde wîp  
 gemeinlich unde wolten sehen  
 daz jâmer daz an ime geschehen  
 158<sup>a</sup> dâ solte von den tieren arc.  
 dô wart ein samenunge starc 1440  
 unde ein grôz gedrenge.  
 diu tier grimm unde strenge  
 dô wurden an den jûngelinc  
 gelâzen al in einen rinc  
 der in dâ was bereitet. 1445  
 doch wart von in geleitet  
 Pantalêôn dô wol gesunt,  
 wan in got lôste bî der stunt  
 von sorgen und von pîne.  
 der kam dar in dem schîne 1450  
 des priesters schiere gegangen  
 von deme er hete enphangen  
 den touf der kristenlichen ê.<sup>9</sup>  
 reht also im was geholfen mê,  
 sus wart er aber dô genert. 1455  
 den grimmen tieren wart beschert  
 von gote ein alsô milter sin  
 daz si vûr in dô giengen hin  
 gûetliche ân allez drœuwen.  
 lêbarten unde lœuwen 1460  
 niht stuonden ime ze vâre.

1429. der strenger      1432. Die man      1433. verserwelten  
 1437. Gemeinlichen    1444. alle      1447. vol      1451. schin g.

- man sach si mit gebäre  
den jüngelinc dô grüezen.  
an henden unde an füezen  
begunden si dô lecken 1465  
den herren âne flecken  
und aller missewende blôz.  
sich huop ein vehten harte grôz  
unde ein vîentlicher strît  
von al den tieren bî der zît. 1470  
Si kriegten welhez under in  
von êrste solte kêren hin  
ze deme junkherren ûz genomen.  
kein tier von ime dô wolte komen  
158<sup>b</sup> ê daz der reine gotes degen 1475  
gæb ime sînen süezen segen  
und ez von dannen hieze gân.  
diz fremde wunder wart getân  
durch den vil tugendebæren.  
daz liez sich dô beswæren 1480  
der keiser unde müejen.  
Pantalêôn dô blüejen  
begunde in hôher werdekeit,  
durchliuhtic pris wart ime geseit  
mit lobelichem schalle. 1485  
die liute meistic alle  
riefen sunder allen spot  
'grôz ist der cristenheite got  
der diz unbilde hât getân.  
man sol gesunt von hinnen lân 1490  
Pantalêônen, sînen kneht:  
daz ist billich unde reht.'
- Der keiser also ein tobie hunt  
begunde wüeten an der stunt  
durch daz geschrei daz dô geschach. 1495  
swaz liute dô rief unde sprach,  
man solte lân den jüngelinc,  
den wurden marterlichiu dinc

1470. allen den 1472. da solte 1474. wolte von im da k.

1484. war 1490. von hinnan gân

- durch sîn gebot erzeiget.  
 gevellet unde geveiget 1500  
 vil schiere wurden tûsent man.  
 den hiez der keiser legen an  
 gar einen bitterlichen tût.  
 seht, alsô wart ir bluotes rô  
 vergozzen dô vil manic trahen. 1505  
 Maximîan der hiez erslahen  
 diu wilden tier durch sînen zorn  
 diu den junkherren wol geborn  
 niht wolten frezzen bî der frist.  
 Pantalêôn der lobte Crist 1510  
 der manicvalten helfe sîn.
- 158° er sprach 'vil sûezer trehtîn,  
 prîs unde lop sî dir geseit  
 der gnâden unde der sælekeit  
 daz dû geruochtest, herre got, 1515  
 daz maneger hie durch dîn gebot  
 ein marterlichez ende lite.  
 dû woltest niht gnuoc hân dâ mite  
 daz liute durch den willen dîn  
 hie trûegen strenger nœte pîn, 1520  
 du enliezest ouch diu tier durch dich  
 hie lîden marter engestlich.'
- Pantalêôn die rede treip.  
 dâ von der keiser dô beleip  
 vil zornic unde sprach alsô 1525  
 mit einem argen munde dô  
 ze sînem ingesinde.  
 'waz tuon ich diseme kinde  
 daz hie mit zouber wundert  
 und von den goten sundert 1530  
 alt unde junc, man unde wîp?  
 hie wirt verkêret manic lîp,  
 ob ich im niht daz leben nime.'  
 der rede antwûrte gâben ime  
 die besten alle von der stat. 1535

si sprâchen 'herre, lâz ein rat  
 und eine schîben machen  
 von künstebæren sachen  
 und heiz in dar in binden;  
 sô muoz er sînen linden 1540  
 und sînen weichen lîp verzern.  
 wiltû des lebenes in verhern  
 und gar zefûeren sîniu lider,  
 sô werde ab einem berge nider  
 gelâzen beide schîbe und er. 1545  
 dâ von sîn verch hin unde her  
 158<sup>d</sup> beginnet sich engenzen.  
 jâ muoz sich dô verschrenzen  
 sîn fleisch und sîn gebeine.  
 die stocke und ouch die steine 1550  
 zerfûerent ime hût unde vel,  
 wan swie diu schîbe sinewel  
 beginnet walzen hin ze tal,  
 sô wirt zerteilet über al  
 sîn lîp in kleiniu stückelin. 1555  
 daz schulde rîche leben sîn  
 muoz er zehant verliesen.  
 sol er sîn ende kiesen,  
 daz mac geschehen, herre, alsô.  
 der rât Maximîâne dô 1560  
 vil ûzer mâzen wol geviel,  
 wan sîn gemüete in zorne wiel  
 ûf den erwelten gotes kneht.  
 der keiser durch sîn unreht  
 den jûngelinc gehalten bat 1565  
 biz ime gesmidet würde ein rat  
 ûz isen unde ein schîbe,  
 dâ mite er sime lîbe  
 dô mëren wolte leides klage.  
 er wart beslozen drizic tage 1570  
 in eime tiefen kerker,  
 durch daz sîn angest sterker

1542. lebnden    1543. schiben    1546. werk    1551. ime och hut  
 1552. swie] swen    1567. eine schiben    1568. lîben

- dâ würde und al sîn arbeit.  
 ouch was diu schibe dô bereit  
 dâ man zerfüeren wolte mite 1575  
 sîn verch wol reine und wol gesite.  
 Si wart erziuget schône  
 mit rîcher koste lône,  
 als ez gebôt Maximîân.  
 Pantalêôn der muoste gân 1580  
 des endes dâ diu schibe was.  
 ze gote er sîn gebete las  
 159<sup>a</sup> und bat in der genâden sîn.  
 er sprach 'vil lieber trehtîn,  
 dû neige mir dîn ôre 1585  
 von dîne himelkôre  
 und stiure mînen ungewin.  
 sît ich arm unde dûrstic bîn,  
 sô werde mir dîn trôst gesant.  
 dû lâ mir dîne zeswen hant 1590  
 stiur unde helfe reichen.  
 beganc an mir ein zeichen  
 durch die götlichen güete dîn,  
 sô daz die widersachen mîn  
 und die mich hazzent müezen sehen 1595  
 daz mir diu gnâde sî geschehen  
 daz mich dîn helfe rîcher trôst  
 ûz mînen sorgen habe erlôst.'  
 Nû der junkherre diz gebete  
 gesprochen flizeclichen hete 1600  
 dô was er bî den stunden  
 vil schiere dâ gebunden  
 mit starken riemen ûf daz rat.  
 sîn reiner lîp wîz unde glat  
 genzlichen wart enblecket 1605  
 und alsô blôz gestreeket  
 ûf die vertânen schîben,  
 die man begunde trîben  
 zchant ûf einen hôhen berc,

## PANTALEON.

239

- durch daz man griuwelichiu werc 1610  
 begienge an deme vil reinen.  
 an stocken unde an steinen  
 zerbrechen wolte man den helt  
 den got ze kemphen hæte erwelt  
 und ime geruochte bi gestân. 1615  
 diu schibe diu wart an gelân  
 dar umbe daz si liefe nider  
 und ime zerfuorte sîniu lider  
 159<sup>b</sup> mit scharpfer und mit strenger nôt.  
 man wolte im einen grimmen tôt 1620  
 dô stiften unde briuwen.  
 dô lôste in ûz den riuwen  
 sîn herre, der vil sûeze Krist,  
 der ime begegente an der frist  
 und in genêrte sâ zehant. 1625  
 die stricke brâchen und diu bant  
 dâ mite er was gebunden,  
 und wart er âne wunden  
 des lîbes und des herzen  
 erlœset von dem smerzen 1630  
 der marterlichen quâle.  
 diu schibe zuo dem mâle  
 schuof dô vil ungewinnes,  
 wan si lief widersinnes  
 an die verworhten heiden, 1635  
 der si begunde scheiden  
 ein wunder von dem lebetagen.  
 fünf hundert man ze tôde erslagen  
 dô wurden von ir loufe snel.  
 Pantalêôn lid unde vel 1640  
 ganz unde wol gesunt behielt.  
 dâ von der keiser zornes wîelt  
 den ime sîn arkheit worhte.  
 vil engestlicher vorhte  
 die burger lîten von der stat, 1645  
 dô man daz griuweliche rat

1616. *das zweite diu fehlt.* 1620. An ime einen gr. t. 1626. stücke  
 1639. wurde



die grimmen slahte briuwen sach  
diu gnuogen dô von ime geschach.

- Nû diz unbilde was geschehen  
und dô der keiser hete ersehen 1650  
daz in dâ half niht an der stete  
daz er Pantalêône tete,  
dô sprach der heiden wider in  
'sag an, wer hât die künste dîn  
und disen list gelêret dich 1655  
159<sup>c</sup> daz dir kein marter engestlich  
enwirret noch kein argez dinc?'  
'mich lêrte' sprach der jûngelinc,  
'der priester Ermolâus.  
er hât mich underwîset sus 1660  
und ist der meister mîn gewesen.  
swaz ich ze herzen hân gelesen  
witz unde guoter künste,  
daz ist von sîner gûnste  
mir widervaren unde geschehen.' 1665  
'nû sprich, möht ich in hie gesehen?'  
sprach aber dô Maximîân.  
'ich wolte ouch sîne lêre hân  
und sîner meisterschefte gunst,  
durch daz ich etelîche kunst 1670  
von ime gelernen möhte  
diu mîner sêle töhte  
und mir zen êren wære  
nütz unde helfebære.'
- Die rede treip durch âkust 1675  
der keiser, wande in sîner brust  
versigelt lac valsch unde mein.  
den priester, der geliutert schein  
vor wandelbæren sinnen,  
wolt er alsus gewinnen 1680  
159<sup>d</sup> und für sich bringen alzehant.  
den valsch den hæte an ime erkant  
Pantalêôn vil schiere dô.

PANTALEON.

241

dô sprach er wider in alsô.  
 'gebiutest duz, ich bringe dir 1685  
 mit willecliches herzen gir  
 den meister unde den herren min  
 der mit der hôhen lêre sîn  
 dir mac gehelfen unde gefromen.  
 'jâ' sprach der keiser, 'heiz in komen 1690  
 und lâz in werden her besant.'  
 sus gienc Pantalêôn zehant  
 enwec schier unde snelle  
 und ilte zuo der zelle  
 dà der priester inne was 1695  
 und alle zît sanc unde las  
 ze prîse dem erwelten gote.  
 doch gie Maximîânes bote  
 mit Pantalêône dar,  
 durch daz er sîn næme war 1700  
 und er in hete in siner pfliht,  
 daz er entrinnen möhte niht.  
 Nû daz er in die zelle kam  
 für sînen meister lobesam,  
 dô wart er sîner künfte frô. 1705  
 'diu zît ist komen' sprach er dô,  
 'daz man mich kroenen sol mit dir.  
 ein stimme kam hînaht ze mir,  
 diu seite, ich solte strîten  
 den kampf in kurzen zîten 1710  
 den Pantalêôn ouch strite.  
 hie weiz ich unde erkenne mite  
 daz ich die marter lîden sol.'  
 sus giengen si dô fröuden vol  
 hin zuo dem keiser alzehant. 1715  
 und dô er hete alrêrst bekant  
 daz für in kam der priester hin,  
 dô sprach der keiser wider in  
 'friunt, sage mir ze diute,  
 wie nennent dich die liute?' 1720

1689. helfen 1693. sicher

Z. F. D. A. VI.

16

- Des gap er im antwürte alsus.  
 'herr, ich heiz Ermolâus'  
 sprach er gezogenliche dô.  
 'von êrste ich wart genant alsô  
 von mînen friunden lobesam. 1725  
 noch zieret mich ein bezzer nam  
 160' mit sîner tugende listen:  
 ich bin genant ein cristen  
 und wil ouch iemer einer sîn.'  
 'nû tuo mir hie mit worten schîn' 1730  
 sprach aber dô Maximîân,  
 'sihet man dich bî dir hân  
 iht bruoder unde gesellen  
 die gerne erfüllen wellen  
 al dîne lêre und dîniu wort?' 1735  
 'jâ' sprach er, 'ich hân zwêne dort  
 die mîne bruoder sint in gote.  
 si lebent wol nâch mîme gebote  
 und habent mir gevolget ie.'  
 der keiser sprach 'wie heizent die? 1740  
 daz lâ mich wizzen unde enstân.'  
 der kiusche reine capellân  
 bôt ime balde antwürte des.  
 'Hermippus und Hermocrates  
 si zwêne sint genant' sprach er. 1745  
 'nû lâ si beide komen her'  
 sprach dô der keiser wider in.  
 sus wart nâch in gesendet hin  
 dâ man si bî der zîte vant.  
 ze hove kâmen si zehant 1750  
 mit ein ander dô gezoget,  
 dâ si der heidenische voget  
 mit worten und mit rede enphie.  
 er sprach 'ir herren, ir sît die  
 der rât Pantaleônen, 1755  
 den werden und den vrônen  
 goten hât alsô genomen

- daz er ist von ir opher komen  
und er niht heizen wil ir kneht.  
'herr, ez ist billich unde reht' 1760  
sprâchen si dô beide,  
'daz er sich von in scheide  
160<sup>b</sup> und daz er Criste diensthaft  
sî mit aller sîner kraft.'  
'Ir herren, redent niht alsô' 1765  
sprach der gebietære aber dô  
schôn unde minneclîchen zîn.  
'sît rîlîch kunst und edel sîn  
iuch zierent beide und êrent,  
sô râtent unde lêrent 1770  
daz iuwer friunt Pantalêôn  
den goten heilic unde vrôn  
mit sîme dienste bî gestê.  
swie daz geschiht daz unser ê  
der jûngelinc wil halten, 1775  
ich lâze iuch beide walten  
rîlîches guotes âne zal.  
ir mûezent sîn ûf mîme sal  
liep unde wert spât unde fruô.  
dâ von sô flîzent iuch dar zuo 1780  
daz er durch iuwer lêre  
zen goten wider kêre  
und gebe in sînen prîsant.'  
'nein herre' sprâchen si zehant,  
**Hermippus und Hermocrates,** 1785  
'wir sulen in niht heizen des  
daz sîme heile unrehte kome.  
der rât wær ime ze nihte frome  
daz wir in hiezen bringen  
als üppeclîchen dîngen 1790  
sîn opher und die gâbe sîn.  
got, unser aller trehtîn,  
der himel schuof und erden,  
der sol geprîset werden

1764. Ist, *aber I steht vor ausgestrichenem S.*

1765. nihter

1783. Vû geben s. pr. 1786. Wir ensullen

	von ime in allen enden.	1795
	mit herzen und mit henden	
	sol er sîn opher bringen deme,	
	als ez dem namen sîn gezeme.'	
160°	Hie mite was diu rede hin.	
	die vier gesellen under in	1800
	von gotes geiste wielen.	
	an ir gebete si vielen	
	des si mit flîze pflâgen.	
	diu stat an der si lâgen	
	erbibente unde erwagete,	1805
	daz übele dô behagete	
	dem keiser an der stunde.	
	mit eime valschen munde	
	begunde er sprechen aber dar	
	'die gote sint erzürnet gar.	1810
	dâ von diz wunder hie geschiht	
	daz man daz ertrîche siht	
	erschûten sich durch die getât	
	daz man ir muot betrüebet hât	
	mit sünden und mit meine.'	1815
	Pantalêôn der reine	
	gap ime der rede antwûrte dô.	
	wislîche sprach er zime alsô.	
	'Maximiân, dû sagest wâr.	
	die gote die sint offenbâr	1820
	erzürnet unde betrüebet,	
	wan ez ist an in güebet	
	diu lasterlîche smâheit	
	daz si gevallen unde geleit	
	sint zuo dem ertrîche nider.	1825
	ir touben unde ir lamen lider,	
	an aller sælekeite blint,	
	zerstücket und zebrochen sint	
	und ligent ûf der erde	
	in schamelichem werde.'	1830
	Der keiser dô niht wolte	

- gelouben daz er solte  
 gesmæhet an den goten sîn.  
 er sprach 'geswic der kleffe dîn,  
 160<sup>d</sup> vil sinnelôser jûngelinc. 1835  
 dû redest üppeclichiu dinc.  
 dû gouch, war umbe tuostû daz?'  
 nû daz er in der rede saz  
 mit dème junkherren wol getân,  
 dô kam zehant fûr in gegân 1840  
 ein bote, der seit ime iesâ  
 daz sîne gote wæren dâ  
 zervallen und zerflecket.  
 des wart sîn muot erschrecket  
 mit zorne bî der stunde. 1845  
 von grimmes herzen grunde  
 sprach der vil arge heiden  
 'ich sol benamen scheiden  
 die zouberære ûz dirre stat  
 die mîne gote an êren mat 1850  
 und an ir wurde tuont alsô.'  
 mit disen worten hiez er dô  
 den kerker ûf entsliezen  
 und dar in balde schiezen  
 den helt Pantaleôn 1855  
 der nâch der himele krônen  
 vaht verwegenliche alsus.  
 der priester Hermolâus  
 und die zwêne bruoder sîn  
 die muosten angestbæren pin 1860  
 dâ lîden vil gemeine.  
 ir fleisch und ir gebeine  
 Maximîân hiez villen.  
 in wart durch gotes willen  
 vil manic marter an geleit. 1865  
 ze jûngest sluoc man unde sneit  
 in allen drîn ir houbet abe.  
 heinliche wurden si ze grabe  
 gefüeret von den cristen.  
 die stâlen si mit listen 1870

- 161<sup>a</sup> und hiezen si bestaten sider.  
 Pantalêôn wart aber wider  
 gefüeret für den keiser hin.  
 der sprach mit zorne wider in  
 'Vil tumber, unde wænest dû 1875  
 daz dû von mîner bende nû  
 gar âne swære entrinnest?  
 nein zwære, dû gewinnest  
 vil marterlicher ungeschicht, 1880  
 ob dû den goten bringest niht  
 daz opher unde den prisant dîn.  
 dâ vor soltû gewarnet sîn,  
 und überhebe dich der nôt.  
 vermit den angestbæren tôt  
 und kêre zuo den lebetagen 1885  
 wiltû iht sælden hie bejagen,  
 sô tuo dich dîns gelouben âbe.  
 gehûge wie sich bekêret habe  
 dîn meister Hermolâus.  
 gedenke daz Hermippus 1890  
 und sîn geselle Ermocrates  
 sich wellent flîzen alles des  
 daz mînen goten êre sî.  
 jâ volgent si mir alle drî  
 mit willeclicher andâht. 1895  
 ich hân si von ir muote brâht  
 in mîns gelouben orden.  
 vil undertænic worden  
 sint mir die selben liute.  
 si tuont swaz ich gebiute 1900  
 mit herzen und mit munde.  
 dâ von si zaller stunde  
 enphâhent hôher werde lôn.  
 dâ sich dû an, Pantalêôn,  
 und volge den gesellen dîn. 1905  
 belîp hie mit in allen drîn.
- 161<sup>b</sup> liep unde wert in mîme sal

1879. marterliche  
 1907. minen

1886. iht] mit

1891. emocrates

1894. Joch

## PANTALEON.

247

und biut den goten über al  
 pris unde lop, daz ist mîn rât,  
 wan ez dir an dîn leben gât, 1910  
 ob dû dich niht bekêrest  
 und si mit opher êrest.'

Mit disen worten unde alsô  
 der übele keiser wolte dô  
 den jüngelinc betriegen, 1915  
 wan er begunde im liegen  
 von den drin marteræren.  
 er seite im daz si wæren  
 vil gar in sînen willen komen:  
 dô was daz leben in benomen, 1920  
 als ich dâ vor bescheiden hân.  
 der lüge begunde sich entstân  
 Pantalêôn der guote.

ez was im in dem muote  
 von gotes geiste worden schîn 1925  
 wie den gesellen allen drin  
 von strenger marter wê geschach.  
 dâ von er zuo dem heiden sprach  
 'sît dû mir hâst verjehen des,  
 Hermippus und Hermocrates 1930  
 und Hermolâus leben noch,  
 sô lâ mich si geschouwen doch  
 vor dîner ougen angesiht.'

'nein' sprach er, 'dû maht ir niht  
 vor mir gesehen nû zehant. 1935  
 ich hân ze boten si gesant  
 ze fremden steten anderswar.  
 dâ nement si des dinges war  
 daz in von mir bevolhen ist.'  
 sâ zehant und an der vrist 1940  
 der jüngelinc antwurte.

den valsch er balde spurte  
 des ime der keiser dô verjach.  
 161° dar umbe er wider in dô sprach  
 'Böeser hunt, ez ist dîn site 1945  
 daz valscher munt dir volget mite



- und daz dû dicke triugest.  
 swaz aber dû geliugest,  
 doch hâst dû mir nû wâr geseit.  
 ez ist ein ganziu wârheit 1950  
 daz dû ze boten hâst gesant  
 den meister mîn in fremdiu lant  
 und sîne gesellen beide.  
 in spilender ougenweide  
 siht man die werden alle drî. 1955  
 diu stat ist missewende vrî  
 dar in si von dir sint gevarn.  
 ze himele in der engel scharn  
 sint si gekrœnet schône  
 und ist ouch mir ein krône 1960  
 rîlich unde wol bereit.  
 diu sol mir werden ûf geleit  
 sô daz ich si beginne tragen  
 schiere in kurzeelichen tagen.'
- Maximiân, als der vernam 1965  
 an deme junkherren wunnesam  
 daz er sich weder sus noch sô  
 von Jêsu Cristô wolte dô  
 mit sînem muote scheiden,  
 dô gebôt der heiden 1970  
 den sînen duræhtæren  
 daz si den tugendebæren  
 ze velde balde fuorten hin  
 und im daz houbet under in  
 mit eime swerte slüegen abe 1975  
 und ûf des grünen plânes habe  
 den lip ze pulver branten.  
 die knehte die volanten  
 161<sup>d</sup> daz in gebôt Maximiân.  
 er wart ze velde ûf einen plân 1980  
 gefüeret under einen boum  
 der einen wünneelichen soum  
 von loube in sîner zîte bar.

PANTALEON.

ein durchtëre gienc aldar  
mit eime scharpfen swerte blôz. 1985  
dem kiuschen marterære grôz  
wolt er daz houbet abe slahen  
und sînes bluotes manegen trahen  
unschuldelige rêren.

do enwolte sîn niht sêren 1990  
daz edele und daz tiure sahs.  
lind unde weich reht als ein wabs  
wart daz vil guote harte swert.  
den gotes kemphen lobes wert  
moht ez dô niht verwunden. 1995

und dô die knehte enphunden  
die sînes tôdes wolten gern  
daz in daz swert dô niht gewern  
verlûste mohte bî der zît.

dô vielens ûf dem plâne wît                      2000  
ze fuoze dem getriuwen.  
mit herzenlichen riuwen

den reinen bätens under in  
daz er durch sîner tugende sin  
den süezen Crist dô bæte

daz er in gnâde tæte  
mit veterlicher hulde  
und in vergæbe ir schulde.

Pantalèon der guote  
mit lûterbarem muote  
die knehte dô gewerte  
des âne wandel gerte  
ir wille bî der stunde.

mit herzen und mit munde

162 <sup>a</sup>	rief er ze himele unde sprach	2015
	got, aller sælden oberdach	
	und aller tugende ein überhort,	
	geruoche erhoeren mîniu wort	
	und ère mich des ich hie ger.	
	dis armen liute dû gewer	2020

1984. Der durechter gieng einer dar  
vñ groz

der gnâden und der hulde dîn.  
 ir schult lâz in vergeben sîn  
 und swaz ir lîp begangen hât.  
 verkîus ir grôzen missetât  
 und hilf in dort ûz aller nôt. 2025  
 swer ûf der erde mînen tôt  
 und mîne marter êre,  
 dem hilf daz er bekêre  
 von sünden und von meine sich.  
 vil süezer Crist, erbarme dich 2030  
 über die mich ruofen an.  
 swer mîner swære mich erman  
 und mîner grôzen pîne,  
 got herre, deme erschîne  
 genâdîclîchiu milte. 2035  
 sît daz dich nie bevilte  
 gûet unde erbarmeherzekeit,  
 sô stille im hie die arbeit  
 an lîbe und an der sêle dort  
 und gip im stæter frôuden hort.' 2040  
 Nû daz er diz gebete getete,  
 dô wart erhœret an der stete  
 ein stimme diu von himele sprach  
 'Pantaleôn, dîn ungemach  
 ein ende wil enphâhen. 2045  
 dîn sêle diu sol gâhen  
 ûf zuo der himele kœren.  
 got wil dich erhœren  
 der dinge diu dû hast begert,  
 wan dû wirst alles des gewert 2050  
 des in dîn munt gebeten hât.  
 162<sup>b</sup> dîn trôn vil wol gezieret stât.  
 der engel schar dîn beitet.  
 ein krône ist dir bereitet  
 diu dich ân ende zieren muoz. 2055  
 dû solt den kumberhaften buoz  
 swær unde sorge machen.

2031. Vber alle die

2035. Genedig vñ milte

2037. gûte erb.

2038. hie *fehlt*.

## PANTALEON.

251

die siechen und die swachen  
 din arzenie wol ernert.  
 swer ûf dem wâge in noeten vert, 2060  
 dem hilfestû ze lande wol.  
 dîn trôst ûz banden lœsen sol  
 den armen der gevangen ist.  
 vertriben mac dîn hôher list  
 vil maneger hande sühete pîn. 2065  
 dû solt ein duræhtære sîn  
 der tiuvel zallen stunden:  
 swer mit in ist gebunden,  
 den lœset dîn erbarmkeit.  
 dîn trôst ist allen den bereit, 2070  
 ez sîn frouwen oder man,  
 die dich in noeten ruofent an.'

Diu gotes stimme reine,  
 dô si die rede gemeine  
 vil gar nâch sînes herzen kûr 2075  
 bescheidenliche brâhte fûr,  
 dô sprach Pantaleôn ze jenen  
 der hant in schaden solte wenen  
 'ir herren die vor mir hie stânt,  
 swaz iu geboten sî, daz lânt 2080  
 erfüllet an mir werden.'  
 sus viel er zuo der erden  
 diemüetecliche in kriuzestal.  
 und also er dô getet den val,  
 dô gienc ir einer dâ zehant 2085  
 die mit im wâren ûz gesant  
 und sluoc im abe daz houbet,  
 162° als ez im wart erloubet  
 dô von dem marterære.  
 der reine tugendebære 2090  
 ze himele sante sînen geist.  
 durch hôher wunne volleist  
 kam er vûr gotes ougen.  
 dâ wart er sunder lougen

- enphangen von der engel schar. 2095  
 sîn verch alsam ein snê gevar  
 und also ein blankiu lilje wart.  
 dô flôz nâch heileclicher art  
 von sîme kiuschen lîbe guot  
 gar wîziu milch für rôtez bluot. 2100  
 Sich huop dô fremdez wunder.  
 der boum dâ man im under  
 het abe sîn houbet dô geslagen  
 begunde bringen unde tragen  
 des selben mâles niuwe fruht. 2105  
 an im wûohs obez mit genuht  
 bî der wîle und bî der stunt  
 dô sîn vil reiner lîp verwunt  
 mit einem scharpfen swerte wart.  
 diz grôze unbilde niht verspart 2110  
 vor den burgæren mohte sîn:  
 ez wart in offenliche schîn,  
 wande ir kam vil manic schar  
 gedrunge unde geloufen dar  
 daz si daz wunder sâhen 2115  
 und heilekeite jâhen  
 dem edelen marterære.  
 der keiser von dem mære  
 wart vil trûric unde unfrô.  
 den selben boum den hiez er dô 2120  
 zerschîten und zerschrôten  
 und bat dâ mite des tôten  
 162<sup>1</sup> junkherren lîp verbrennen.  
 die knehte got erkennen  
 begunden schiere und alzehant 2125  
 die mit im wâren ûz gesant  
 durch daz si mêrten sînen schaden.  
 sie liezen netzen unde baden  
 sich in des toufes brunnen.  
 ir sêle wart gewonnen 2130  
 got âne missewende.

seht, alsô nam ein ende  
 Pantalêôn der reine,  
 den al diu werlt gemeine  
 solt êren unde prîsen. 2135  
 er kan die liute wîsen  
 von kumberlichen sachen  
 und mac die nôt gewachen  
 des wîbes und des mannes.  
 von Arguel Jôhannes, 2140  
 der Winharten tohter kint,  
 geschuof daz sîniu wunder sint  
 alsus getihtet schône.  
 mit sîner miete lône  
 brâht er si von latîne 2145  
 ze tîuscher worte schîne  
 dar umbe daz die liute  
 vernâemen dran ze diute  
 daz er kan trûren stœren.  
 die diz getihtete hœren, 2150  
 und swer die marter sîn verneme,  
 die wûnschen heiles alle deme  
 der diz werc gefrumet hât.  
 und wizzent daz helf unde rât  
 der reine marterære tuot 2155  
 in allen die getriuwen muot  
 ze herzen tragent wider in:  
 er stœret leides ungewin.